



Program revitalizacije zgrade institucija BiH

U okviru revizije Službe za zajedničke poslove institucija BiH (u okviru kojih su vršeni administrativni – tehnički poslovi), revidirali smo Program za revitalizaciju zgrade institucija BiH. S obzirom na činjenicu da je program definiran odlukom Vijeća ministara dostavljamo vam slijedeća zapažanja uočena tokom revizije Programa.

Revidirajući Program revitalizacije zgrade institucija BiH (u daljem tekstu: Program), tokom 2004. godine, nismo uočili značajnije aktivnosti i pomake u realizaciji Programa – što je naša osnovna primjedba. Revidiranjem spomenutog Programa utvrdili smo kako su tokom 2004. godine, za potrebe Programa bila rezervirana budžetska sredstva u iznosu 1.955.830,00 KM pod nazivom "Rezervisanja za sufinansiranje objekta 3 na Marijin Dvoru", a ista su realizovana u iznosu 195.805,93 KM što predstavlja 10% od rezervisanih sredstava.

Po mišljenju revizije razloge neopravdane sporosti u realizaciji spomenutog Programa treba tražiti prije svega, u nedovoljno efikasnoj i racionalnoj strukturi upravljanja Programom. Sama koordinacija između Odbora projekta, nacionalnog koordinatora, Službe za zajedničke poslove institucija BiH i Vijeća ministara nije u potpunosti zadovoljavajuća, niti su jasno i precizno određene nadležnosti i definisani zadaci u ovom, izuzetno važnom i vrijednom projektu. Potvrda mišljenja revizije o neopravdanoj sporosti (na koju smo ukazivali, a to činimo i ovaj put), su i ozbiljna upozorenja grčkih donatora na sporost organa vlasti BiH u realizaciji spomenutog programa, te bi mogla u pitanje biti dovedena i donatorska sredstva Vlade Grčke.

Za realizaciju ovoga Programa je formiran Odbor projekta (28.02.2002. godine) sa zadaćom koncipiranja i uspostavljanja organizacione strukture za provedbu ovog Programa sa težištem na korištenje kadrova institucija BiH, te mogućnost angažovanja specijalnih konzultantskih usluga, dok se svi pravni, tehnički, računovodstveni i operativni poslovi organizuju i realizuju u okviru djelatnosti Službe zajedničkih poslova institucija BiH. U razgovoru sa predsjedavajućim Odbora smo zaključili da su, po njegovom mišljenju, aktivnosti Odbora završene i da nema potreba za daljnje funkcionisanje Odbora. Također napominjemo da Odbor nije sačinio jedan konačni izvještaj za svoj rad koje bi sadržavalo, između ostalog i dalje korake u smislu funkcionisanja ili prestanka rada.

Ured za reviziju smatra potrebnim i predlaže obavezno sačinjavanje konačnog izvještaja o radu Odbora i prezentacija istoga Vijeću ministara, radi donošenja odgovarajućih zaključaka.

Kada je u pitanju funkcionisanje Ureda nacionalnog koordinatora Programa bilateralne ekonomske saradnje, moramo istaći sljedeće činjenice:

- nije formiran ili, bolje rečeno, nije funkcionisao zajednički Upravni odbor, Komitet i Nadzorni odbor HIPERB-a u okviru čega se realizuje ovaj Program (po riječima nacionalnog koordinatora, Vlada Grčke nije delegirala svoje članove);
- cjelokupne aktivnosti je provodio nacionalni koordinador (pregovori sa Vladom Grčke, raspisivanje konkursa), što po mišljenju revizije, nije preporučljivo, pogotovo u daljoj realizaciji projekta. Smatramo da bi ključne odluke trebao donositi Upravni odbor, a nacionalni koordinador provoditi iste;
- sugerišemo razmatranje ideje o formiranju Agencije za izgradnju objekta ili uspostavu projekt menadžmenta u cilju racionalnijeg i transparentnog upravljanja realizacijom projekta.



Tokom razgovara sa nacionalnim koordinatorom, dobili smo uvjerenja da će se Program početi realizovati polovicom 2005. godine i da su, po mišljenju nacionalnog koordinatora otklonjeni gotovo svi problemi koji su bili prisutni proteklih godina. U neposrednoj budućnosti očekuje se potpisivanje ugovora sa izvođačem radova i uvođenje izvođača u posao (radi se projektu čija vrijednost je cca. 15.000.000,00 EUR). Sam proces izbora izvođača i potpisivanje ugovora nije bio završen tokom revizije za 2004. godinu, pa će isti proces biti revidiran u 2005. godini.

Ured za reviziju sugeriše Vijeću ministara da razmotri slijedeće naše sugestije i prijedloge:

- **Traženje i sačinjavanje konačnog izvještaja Odbora projekta za revitalizaciju zgrade institucija BiH;**
- **Razmatranje izvještaja i donošenje konačne odluka o daljem statusu Odbora;**
- **Insistiranje na funkcionisanju Upravnog odbora (s obzirom na činjenicu da su članovi Vijeća ministara i članovi Upravnog odbora) i Nadzornog odbora HIPERB-a;**
- **Traženja izvještaja o preduzetim aktivnostima na dobijanju dozvole za gradnju od Službe koja je zadužena za pribavljanje svih potrebnih dozvola za građenje (ovo napominjemo zbog mogućih nepredvidivih poteškoća i sporosti procesa dobijanja spomenutih dozvola);**
- **Razmotriti ideju o postavljanju funkcionalne strukture upravljanja i rukovođenja projektom na primjer, formiranje projekt menadžmenta u cilju brže, efikasnije i transparentnije izgradnje objekta. Posebno naglašavamo potrebu jasnog i preciznog definisanja obaveze i zadataka svakog od čimbenika u Programu, s obzirom da je riječ Programu koji se finansira iz stranih sredstava;**
- **S obzirom da se radi o donatorskim sredstvima i, manjim dijelom, učešću BiH institucija potrebno je, prilikom zaključivanja ugovora o realizaciji projekta, angažovati ili koristiti usluge eksperata iz ovih oblasti;**
- **Aktivno uključenje u praćenje realizacije ovog izuzetno važnog projekta;**
- **Voditi računa o ugledu BiH, te nastojati da se sve preuzete obaveze izvršavaju profesionalno, zakonito i na transparentan način u cilju očuvanja rejtinga institucija BiH.**

U nadi da će konačno započeti konkretni i vidljivi pomaci u realizaciji Programa podržavamo i cijenimo aktivnosti koje su preduzete tokom 2005. godine.

**ZAMJENIK GENERALNOG
REVIZORA**

Samir Mušović

GENERALNI REVIZOR

Milenko Šego

**ZAMJENIK GENERALNOG
REVIZORA**

Dragan Kulina